

BRAĆO JUGOSLOVENI

OSNOVNI KARAKTER

JNO je jugoslovenska, dakle može da radi isključivo u korist jugoslovenskog naroda. Ona je narodna, dakle nacionalna, ne internacionalna organizacija. Samo joj ime kaže da je Odbrana, t. j. da joj je cilj odbrana jugoslovenskog naroda od neprijatelja.

JNO je demokratska institucija; ona je to bila od svojega postanka 1908 godine. Za vrijeme prošloga rata bila je demokratska, i takova mora ostati, ako ne će da se iznevjeri svojoj vlastitoj slavnoj tradiciji, savezničkoj glavnoj lozinki i želji većine jugoslovenskoga naroda. Kao demokratska, ne diktatorska, organizacija, ona je samostalna i ne prima naloge ni odozgo ni odozdo.

TRADICIJA

Naša pe organizacija s imenom preuzela i tradiciju Narodne Odbrana. Toj tradiciji ona mora ostati vjerna, inače bi preuzimanje toga imena značilo uzurpaciju ili masku.

Tradicija JNO leži u odbrani jugoslovenskog naroda od tuđega ropstva. Prva je Narodna Odbrana osnovana sa ciljem da oslobodi Južnu Srbiju od Turaka; njenj su se članovi ovjenčali velikom slavom 1912 godine u Balkanskom Ratu. Ista je Narodna Odbrana povelu borbu protiv aneksije Bosne i protiv stoljetnoga ugnjetavanja Hrvata i Slovenca u Austro-Ugarskoj; na hiljade članova ondašnje Narodne Odbrane dali su svoje živote za tu borbu za vrijeme Svjetskoga Rata.

Južoamerička JNO osnovana je 1915 godine sa željom da se obori Austro-Ugarska i da se svi Srbi, Hrvati i Slovenci ujedinu u svojoj zajedničkoj, slobodnoj i samostalnoj državi. U ono je vrijeme južnoamerička JNO

toliko pomagala, moralno i materijalno, Jugoslovenski Odbor u Londonu da se s ponosom može tvrditi da je ostvarenju jugoslovenske države i ona znatno doprinijela.

Sadašnja JNO ima isti cilj: oboriti tuđjino - nacifašističko - gospodstvo, izvojevati opet demokratsku slobodu našem narodu. Zato JNO, kao ni godine 1908, 1912 i 1914—18, ne ulazi u partijska pitanja. To nikada nije bila njena zadaća, pa nije ni danas.

Njena je zadaća dakle ista kao i onda: JEDINSTVO I OSLOBODJENJE SVIH JUGOSLOVENA. Stoga članovi JNO treba da poštuju tu časnu tradiciju. Statuti Narodne Odbrane prije i za vrijeme Svjetskoga Rata bili su jednostavni. Oni su se sastojali od tri riječi: "SLOBODA ILI SMRT!" Ali te tri riječi bile su dovoljne, da su članovi JNO za njih išli su smrt.

JNO STOJI IZNAD PARTIJA

Kao organizacija koja stoji u službi čitavoga naroda, ona ne služi nijednoj partijskoj ideologiji. Ona se stoga na upušta u partijske borbe nitj se zalaže za programe pojedinih partija, radilo se o komunističkoj ili klerikalnoj, liberalnoj ili konservativnoj.

RIJEČ ĆE IMATI SAMO ONAJ KOJI SE BORI

Članovi JNO u Južnoj Americi ne mogu si prisvojiti neka naročita prava koja pripadaju isključivo narodu koji u zemlji vodi s neprijateljem borbu na život i smrt, borbu kojoj smo mi danas daleki i skoro nijemi svjedoci. Zato će, kad se poslije rata postavi pitanje unutrašnjega uređenja Države, imati riječ jedino onaj naš narod u Domovini koji je svojom aktivnom borbom očuvao slobodu i cjelokupnost svoje i naše rodne grude.